

111 * In questo il Re si partì et la Rezina con le dame; poi se partì monsignor de Orchi et el ducha di Longavilla, e li do ambascadori di Franza, e l'orator nostro, e monsignore di San Zuanne, el qual signor era venuto a levar l'orator nostro, et andono a la caxa che havea dato questo Serenissimo Re al ducha di Longavilla, ch'era lontan dil palazzo di Soa Majestà un bon trato di balestra, *tamen* si tien tutto in un circuito di muro, et in quel luogo lesseno li instrumèti et in tra loro confirmorono; poi feno portar da beber e l'orator nostro tolze lizentia e si partì con quel signor lo levò di caxa, è monsignor di San Zuane, e montono in barca, et veneno a caxa a far bona ziera, et questa è tutta la verità. El zorno sequente, Luni a dì 14, se partì el ducha di Longavilla et uno de li soi ambascadori per andar in Franza; se dize questo Re li feze uno presente de L. 300 de sterlini, ch'è ducati 4 e mezzo per lira, al dito ducha, et si partì con 10 cavali et una careta; da poi fo fato do ambascadori in Franza, monsignor di San Zuanne e monsignor zanberlam, li quali se partì de qui a dì 29 Avosto, e se dize despazadi di Franza, anderà a Roma, et per ventura a Veniexia; i quali è amicissimi di l'orator nostro, et è homeni da conto.

Se dize il re di Franza à mandato a donar de qui a la soa Rezina un bel presente, e che questo Re ge la manderà a dì 5 de Octubrio, le nave se fa presto, in compagnia de assa' signori, tra li altri se dize monsignor di Duran, qual è stato in Franza, al bisogno anderà a Roma, et vol vegnir a veder Veniexia, è amicissimo di l'orator nostro. Prego missier Dominedio sia le bone noze. Se dize che, inteso el principe de Chastiglia che la sua dona promessa era stà data al re di Franza, andò subito nel suo Consejo, e disse a li so consieri: « Ben haverò mia mojer, sicome me avè promesso » con molte altre parole, e li soi consieri, ge rispose: « Vui se' zovene, e il re di Franza e il primo Re de christiani, e non havendo moglie, a lui stà a tuor per Rezina quella dona li piazze; » volendosi scusar; et hessendo a tal parlamento, vardando dito Ducha fuora a una faneslra, vete uno che avea uno astor in pugno, e chiamò uno de li soi consieri, qual era primo suo amico, e disse: « Te priego va a comprarme quello astor, » e rispose el consier: « Cognosso quel astor; 112 è zovene, non sa ancora paissar, non è per la signoria vostra, » el ditto principe disse: « Va ti priego a comprarlo, » e lui volendo seusarsi, a la fin ditto Ducha disse: « Vien con mi » e lo comprò e toselo in pugno e tornò nel Consejo, e se messe a sentar;

poi comenzò a pelar dito astor, et pelando, dito consier dimandava: « Signor che fe vù? » e lui più continuava a pelarlo; quando bene l'ave pelato: « Questo astor vui vedè che l'è zovene e non è stà ancora usado, e per esser zovene, pocho conto se fa d'esso, et per esser zovene quando el pelava non se lamentava; cussì avete fato de mi: son zovene, me avi pelado a vostro bon piaser, et per esser zovene non o sapudo lamentarme, ma tegnive a mente che a tempo avegnir ve pelarò vui, » con grandissime altre parole. Et scrive, s'il re di Spagna avesse ateso a quello promesse a questo Re, non feva mai tal paxe; e cussì è di le promesse de l'Imperador, qual à auto tante milia lire da questo Re per dover esser con la persona el mexe de Mazo et tanta zente a Cales a soldo dil Re contra Franza; ma l'Imperador imborso li danari e non vene, et per questo è seguito quel è stà fato: sichè da ogni banda questo serenissimo Re è stà inganado; però ge à parso tuor quest'altra via. A dì 14 Septembrio, zonse de qui uno ambascador dil re di Franza chiamato monsignor Dansi; si dize à portà presente a la Raina. El zorno sequente che l'arivò, andò a corte, et io el viti andar: davanti de lui era un bel cavallo bianco con do casse, se dice là dentro era li presenti, et la sua compagnia; e si dize, tra li presenti ge à donà uno diamante con una gran perla che val si dize 50 milia scudi. Monsignor di San Zuanne ha scritto di qui aver trovato il re di Franza a Paris, et esser stà ben visto e molto acharezado da Soa Majestà, e fatoli grande honor, et ch'el ducha di Longavilla e soa mojer et 200 dame con assa' altri signori vien incontra di la Rezina fina a Bologna, e inteso il re di Franza che la sia zonta a Bologna el se partirà e vegnirà per iscontrarla e acetarla per Rezina, e andarano a Paris a far i triumphi et feste; et se dize che il Re ge la manderà doman, ch'è a dì e anderà a la volta di passar el mar a la via de Cales con assaissimi signori. Si dize il re di Franza à donado a questa Rezina per contradota il stado de Milan. Che Dio voglia sia le bone 112* noze per Italia. El qual re di Franza à anni 50, et è molto ingotado, e questo Re vorà che sua sorella abi tal ducato.

Dil mexe di Novembrio 1514.

113

A dì primo, fo il zorno di Ogni Santi, et fo pioza. La Signoria vene in chiezia a messa *more solito*, vicedoxe sier Marco Donado el consier, con li oratori di Franza et Ferrara; et compito la messa, si redusse il Colegio, dove era il Principe che li aspetava et ve-